



**Broj: 01-144/21**  
**Vareš, 29.07. 2021. godine**

**Z A P I S N I K**  
**sa 6. sjednice Općinskog vijeća Vareš,**  
**održane 29.06. 2021. godine**

Predsjedavajuća OV pozdravila je sve prisutne.

Izvršena je prozivka vijećnika.

**Prisutni vijećnici:** Mirnes Ajanović, Sahudina Beganović, Nurdin Begović, Maja Berberović, Mahira Brkić, Amela Brkić, Asmir Čizmo, Dario Dodik, Zdenko Franjić, Nazif Hajrić, Igor Hinger, Šaban Ibrišimović, Salih Memić, Mario Mirčić, Nedžad Mušanović, Malik Rizvanović, Nikola Šimić i Edib Zubača.

**Odsutni:** Emir Islamović.

Mahira Brkić – predsjedavajuća Općinskog vijeća Vareš konstatira da Vijeće može raditi jer ima kvorum za rad sjednice.

Predsjedavajuća OV otvorila je 6. sjednicu s početkom u 14,10 sati, u velikoj sali Općine Vareš.

Pored vijećnika sjednici prisustvuju: Općinski načelnik – gosp. Zdravko Marošević, sekretar Općinskog vijeća – gosp. Leon Pavlović, pomoćnici načelnika - gosp. Ermin Musa i gosp. Čedomir Jelić, direktor JU Dom zdravlja Vareš – gosp. Fikret Operta, direktorica JU Centar za socijalni rad – gosp. Nihada Gondžo, direktorica JPU Dječije obdanište Vareš – gosp. – Vjerana Hinger, predsjednik Upravnog odbora JPU Dječije obdanište – gosp. Nikola Mandić, zamjenik direktorice JU Centar za kulturu i edukaciju Vareš – gosp. Stjepan Šimić, direktorica JU Opća biblioteka Vareš – gosp. Ilijana Gavran Radojević i predstavnici medija.

Sekretar OV Leon Pavlović izvijestio je Vijeće da je na 5. sjednici OV održanoj 31.05.2021. godine, Vijeće donijelo četiri (4) zaključaka. Tri (3) zaključka su realizovana a jedan (1) zaključak je u toku realizacije. Postavljeno je pet (5) vijećničkih pitanja. Na sva pitanja je odgovoreno. Podnosiocima pitanja i svim ostalim vijećnicima dostavljen je pisani odgovor.

Općinski načelnik pod aktuelnim pitanjima nije imao obraćanje.

*(Izjašnjavanje vijećnika o dobivenom odgovoru)*

-Dario Dodik – Upoznao je javnost sa dobivenim odgovorima u vezi postavljenog pitanja koje se odnosi na izgradnju vodovoda za sela Pogar i Sjenokos (nije odgovoreno kada se vodovod planira pustiti u funkciju) i asfaltiranje dionica lokalnih puteva u selima Pogar, Zaruđe i Očevija (postavio dodatno pitanje „da li je nedostatak novca razlog što nije put završen“).

*(Vijećnička pitanja)*

**Maja Berberović**

1. U kojoj fazi se nalazi Inicijativa Općinskog vijeća Vareš iz novembra 2017. godine vezano za „Studiju izvodljivosti za zaštitu područja planine Zvijezda koja je upućena Ministarstvu za prostorno uređenje, promet i komunikacije i zaštitu okoliša Ze-do kantona, odnosno da li je Skupština Ze-do razmatrala upućenu Inicijativu i ako nije zbog čega isto nije učinjeno do danas.

**Nurdin Begović**

2. Kada će doći do izgradnje parka za djecu u vareš Majdanu?
3. Zašto nikad nije urađen put i kanalizaciona mreža u MZ Dabravine, lokacija školska bašta gdje su prodane dvije lokacije za građenje stambenih objekata i ko je odgovoran zbog toga? Da li postoji još takvih lokacija na istom lokalitetu?

**Igor Hinger**

4. Kada će se sanirati odron u tunelu?

**Asmir Čizmo**

5. Hoće li se nastaviti sa uklanjanjem ruševnih objekata koji su u privatnom vlasništvu, a čiji vlasnici ne dolaze u Vareš ili ne brinu o imovini?
6. Hoće li se krenuti sa uklanjanjem žbunja, mladih stabala i rastinja sa zidova korita rijeke Stavnje?

**Dario Dodik**

7. Da li je moguće da se riješi problem u vezi autobuske linije Vareš-Zenica? Smatram da načelnik i općinske službe treba da se angažiraju u kantonu jer ovo nije pitanje samo linije Vareš-Zenica, nego je to pitanje zdravstvene zaštite za mnoge stanovnike grada.  
Smatram da bi trebalo i preko kantonalnih vlasti vidjeti da li je moguće da se sufinansira ta pomenuta linija, kako bi se građanima izašlo u susret. (o istom je dao pojašnjenje)
8. Pitanje se odnosi na planirane radove i rekonstrukcije javnih površina u gradu (Vareš i Vareš Majdan). Konkretnije mislim na obnovu asfaltnih površina, obnovu mostova, obnovu zida uz rijeku, krpljenje rupa po ulicama, odčepljivanje i čišćenje šahtova za odvod oborinskih voda, rekonstrukciju

javne rasvjete, saniranje devastiranih stepeništa, obnovu dječjih igrališta, iscrtavanje i označavanje parking prostora itd.

Tražim da se dostavi plan svih rekonstrukcija koje će biti urađene do kraja godine i to po mjesecima sa definisanim rokovima za završetak radova. Dodatno pitanje je, da li su sredstva koja će biti prikupljena od prodaje općinske imovine, a koja nisu bila planirana u budžetu za 2021. godinu, planirana za ove namjene?

### **Sahudina Beganović**

9. Moje vijećničko pitanje odnosilo bi se na čišćenje grada.

Da li postoji mogućnost, ako ne svake sedmice da se grad čisti i pere, onda barem svakih 15 dana? (o istom je dala pojašnjenje)

Predsjedavajuća OV stavila je na raspravu Zapisnik sa 5. sjednice OV.

Nije bilo primjedbi predsjedavajuća OV stavila je na izjašnjavanje Zapisnik sa 5. sjednice OV i nakon izjašnjavanja vijećnika konstatuje da je **jednoglasno sa (16 glasova „ZA“ )** (odsutni vijećnici Asmir Čizmo i Šaban Ibrišimović) **usvojen Zapisnik sa 5. sjednice OV.**

Predsjedavajuća OV stavila je na raspravu prijedlog dnevnog reda za 6. sjednicu OV koji je usaglašen na Kolegiju Općinskog vijeća.

Nije bilo učesnika u raspravi i predsjedavajuća OV stavila je na izjašnjavanje prijedlog dnevnog reda 6. sjednice OV i nakon izjašnjavanja vijećnika konstatuje da **je jednoglasno (sa 18 glasova „ZA“) usvojen sljedeći**

#### *Dnevni red*

- 1. Prijedlog Odluke o načinu i uslovima raspolaganja nekretninama u vlasništvu Općine Vareš (Vareš Majdan, lokalitet „Kram“).**  
- Izvjestilac: Ermin Musa.
- 2. Prijedlog Odluke o davanju saglasnosti za kupovinu građevinskog zemljišta (Kamenjaš Zijad-Sarajevo).**  
- Izvjestilac: Ermin Musa.
- 3. Prijedlog Odluke o prodaji nekretnine radi oblikovanja građevinske parcele Medžlisa Islamske zajednice Vareš (Kosići ZKU Ravne).**  
- Izvjestilac: Ermin Musa.  
-
- 4. Prijedlog Odluke o načinu i uslovima raspolaganja nekretninama u vlasništvu Općine Vareš (Upravna zgrada JKP Vareš).**  
- Izvjestilac: Ermin Musa.
- 5. Prijedlog Odluke o izmjenama Odluke o komunalnom redu.**  
- Izvjestilac: Ermin Musa.
- 6. Prijedlog Rješenja o imenovanju Komisije za popis stanova koji su u vlasništvu Općine Vareš.**  
- Izvjestilac: Klub SBB –Nurdin Begović.
- 7. Izvještaj o radu JU „Dom zdravlja“ Vareš za 2020. godinu.**  
- Izvjestilac: Direktor JU Dom zdravlja Vareš.

- 8. Izvještaj o radu JU Centar za socijalni rad Vareš za 2020. godinu.**
  - Izvjestilac: Direktorica JU Centar za socijalni rad Vareš.
- 9. Izvještaj o radu i poslovanju JPU „Dječije obdanište Vareš“ u 2020. godini.**
  - Izvjestilac: Direktorica JPU Dječije obdanište Vareš.
- 10. Izvještaj o radu JU Centar za kulturu i edukaciju Vareš za 2020. godinu.**
  - Izvjestilac: Direktorica JU Centar za kulturu i edukaciju Vareš.
- 11. Izvještaj o radu JU Opća biblioteka Vareš za 2020. godinu.**
  - Izvjestilac: Direktorica JU Opća biblioteka Vareš.
- 12. Informacija o realizaciji Ugovora o koncesijama za 2020. godinu.**
  - Izvjestilac: Ermin Musa.
- 13. Informacija o provođenju Strategije razvoja i unapređenja socijalne zaštite na području općine Vareš za period 2019-2024. godina, za 2020. godinu.**
  - Izvjestilac: Čedomir Jelić.
- 14. Tekuća pitanja.**

#### **Ad. 1.**

*(Prijedlog Odluke o načinu i uslovima raspolaganja nekretninama u vlasništvu Općine Vareš (Vareš Majdan, lokalitet „Kram“)*

Komisija za statutarna pitanja i propise na 4. sjednici održanoj 22.06.2021. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o načinu i uslovima raspolaganja nekretninama u vlasništvu Općine Vareš (Vareš Majdan, lokalitet „Kram“). Prijedlog Odluke upućuje se Vijeću na razmatranje.**

Otvorena je rasprava u kojoj je učestvovao vijećnik Salih Memić – „Činjenice su sljedeće. Ovaj prijedlog odluke očito ima veze sa Odlukom koja je pripremljena kao druga tačka Dnevnog reda današnje sjednice, jer se radi o parcelama koje su jedna do druge na istom lokalitetu. U ovoj odluci o razlozima za donošenje navedeno je da će se lokacija koristiti za izgradnju poslovno-proizvodnih objekata, a Vijeće bi trebalo da je podrži u interesu stvaranja uslova za privredni razvoj. Zanimljivo je da u svakoj odluci o prodaji općinske imovine se navode neka zainteresirana lica međutim, Vijeće nema informaciju ko su ta lica i kojom će se djelatnošću baviti. Odluka ne definiše ni način utroška sredstava koja bi se naplatila prodajom, te Vijeće ne može kontrolisati namjeru i potrošnju novca od prodate imovine. Nemamo pravobranioca i nemamo potrebno mišljenje u skladu sa propisima da li će ovakva odluka biti štetna po imovinu Općine Vareš. Iz nabrojanih razloga Klub vijećnika SDA je suzdržan oko usvajanja ovakve Odluke i tražimo da se naš stav u potpunosti unese u Zapisnik.“

Nije više bilo učesnika u raspravi i predsjedavajuća OV stavila je na izjašnjanje Prijedlog Odluke o načinu i uslovima raspolaganja nekretninama u vlasništvu Općine Vareš (Vareš Majdan, lokalitet „Kram“).

Nakon izjašnjanja vijećnika predsjedavajuća OV konstatuje da je sa **12 glasova „ZA“ i 6 „SUZDRŽANIH“ glasova usvojena**

***Odluka o načinu i uslovima raspolaganja nekretninama  
u vlasništvu Općine Vareš (Vareš Majdan, lokalitet „Kram“).***

**Ad. 2.**

*(Prijedlog Odluke o davanju saglasnosti za kupovinu  
građevinskog zemljišta (Kamenjaš Zijad-Sarajevo).*

Komisija za statutarna pitanja i propise na 4. sjednici održanoj 22.06.2021. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o davanju saglasnosti za kupovinu građevinskog zemljišta (Kamenjaš Zijad-Sarajevo), s tim da se izvrši izmjena u preambuli prijedloga Odluke u drugom redu riječ „stav“ zamjenjuje se riječju „tačke“, i da se u trećem redu iza riječi „Odluke“ dodaju riječi: „o građevinskom zemljištu Općine Vareš.“**  
**Prijedlog Odluke upućuje se Vijeću na razmatranje.**

Otvorena je rasprava u kojoj su svoje prijedloge, stavove i mišljenja iznijeli vijećnici: Malik Rizvanović (*„Na osnovu teksta ove Odluke očito je da prijedlog Odluke iz prve današnje tačke itekako ima poveznica sa ovom tačkom. Logika upućuje na to da Općina ne bi imala nikakve koristi od prodaje iz prve Odluke jer bi se novac dobiven prodajom parcele „Kram 1447“ dao za kupovinu parcele „Kram 1448“. Kada bi smo to izglasali i kada sve ovo završi, Općina će imati opet dvije parcele, neće imati nikakav novac, a imat će troškove raspisivanja javnog poziva, proceduru i upitno je da li će se iko pojaviti od zainteresiranih lica da to kupuje. I opet nemamo mišljenje pravobranioca. Mi svi znamo da Općina ima dugove, nema novca uopće a kamoli da kupuje zemljište još parcelu koju je drugo lice kupilo prije par godina nje učinilo ništa sa njom, te bi nam ponovo prodao za iste pare. Hoćemo li mi vijećnici početi primjenjivati takvu praksu i smatramo li da li je to ispravno. Ako nam Načelnik i služba prezentiraju dokaze da je to zakonito, nije problem međutim, ovo je klasični primjer usmjerenog pogodovanja i klijentelizma pri kupovini i prodaji općinske imovine, a to je sigurno nezakonito i Klub vijećnika SDA neće učestvovati u istom. Glasat ćemo protiv i tražim da se naš stav unese u Zapisnik“*), Dario Dodik (*traži da izvjestilac da dodatno pojašnjenje, izjavio da će generalno predložiti da Vijeće donese zaključak da se u budućim slučajevima prodaje imovine uz obrazloženje za razloge za prodaju, sastavi i plan utroška sredstava koja će biti ostvarena od te prodaje*), pomoćnik načelnika Ermin Musa (*naglasio je da je Načelnik predlagač svih općinskih akata a da ih službe pripremaju, u dodatnom pojašnjenju izjavio je da je Odluka zasnovana na zakonu i da su u obrazloženju navedeni stavovi. U svim aktima gdje se radi o prodaji općinske imovine navedeno je da kupac snosi troškove sve do plaćanja poreza. U ovom slučaju Općina je kupac. Sljedeća prodaja ove*

*parcele ponovo će ići procjena i ako bude licitacija Općina će profitirati. Ne možemo odgovoriti ko su zainteresovana lica, jer prodaja ide javnim nadmetanjem), Dario Dodik (replika, skrenuo je pažnju da ovlaštenu predlagrač Općinski načelnik nije prisutan) i Mahira Brkić (skrenula je pažnju da i nadležne službe imaju odgovornost jer pripremaju određene akte koje dostavljaju Načelniku na potpis).“*

Općinski načelnik Zdravko Marošević u svom obraćanju upoznao je Vijeće da on kada trenutno nije u Sali OV, sjednicu prati u svom uredu preko Radio Bobovca. Napomenuo je da u dokumentima po svim tačkama dnevnog je navedena osoba koja je zadužena da Vijeću odgovor na upućena pitanja i da eventualna pojašnjenja.

U daljnjem obraćanju izjavio je *“da li nekoga ovdje uvažavam ili ne uvažavam, to znaju građani, ja još jedino pred građanima govorim, a vama vijećnicima ovdje. Postoji neka točka tolerancije i bojim se da ću izaći iz konteksta i počeo ću ... napraviti jedan građanski neposluh i dati svoj doprinos da nekome zavežem usta da me ne uzima tamo gdje mu nije mjesto. Ako imate neku mržnju prema nekome, izađite na ulicu i sačekajte me van zgrade. Ja vas to pozivam i ako me natjerate, uradit ću to i ovdje pod odgovornost općinskog načelnika.“*

Iznio je svoje mišljenje koje se odnosi na određene radnje vijećnika Daria Dodik prilikom uređenja prostora oko svog privatnog objekta (*„vodi teritorije bespravno, bez dokumenata, voda bez koncesije, put bez odobrenja, građevinske, urbanističke, ne obavještavanja rada komunalne inspekcije, ugrožavanja saobraćaja regionalnog puta, proširenja gdje je zabrana metar od regionale zaustavljanja i parkiranja.“*

Predsjedavajuća OV upozorila je Vijeće da zahtijeva totalni mir na sjednici ili će prekinuti sjednicu.

Predsjedavajuća OV dala je pauzu u trajanju 10 minuta.

Nastavljeno je sa radom sjednice.

Predsjedavajuća OV skrenula je pažnju Izvršnoj vlasti i Vijeću na član 37. Statuta Općine Vareš (*„Međusobni odnosi Općinskog vijeća i Općinskog načelnika zasnivaju se na načelima međusobnog uvažavanja i saradnje, uz pojedinačnu odgovornost za ostvarivanje vlastitih nadležnosti i zajedničku odgovornost za funkcionisanje i razvitak općine Vareš.“*) i član 74. stav 2. Poslovnika o radu OV (*„Ukoliko predsjedavajući ocijeni da nije moguće održati red na sjednici, odlučit će o prekidu sjednice i njenom nastavku kada se za to steknu uslovi, ali u roku ne dužem od 15 dana.“*).

Predsjedavajuća OV izjavila je da od Vijeća i Izvršne vlasti očekuje maksimum tolerancije.

Vijećnik Dario Dodik javio se za repliku i izjavio da se njegovo obraćanje odnosilo na ne prisustvovanje predlagrača prilikom rasprave o dvije tačke dnevnog reda gdje je Načelnik naveden kao predlagrač. Moli da se evidentiraju sve uvrede koje je izrekao, prijetnje kao i psovke na izlasku iz sale.

Vijećnik Malik Rizvanović izjavio je da će Klub vijećnika SDA stati u zaštitu svakog vijećnika, čuvati integritet i dostojanstvo vijećnika i da Klub napušta današnju sjednicu.

Klub SDA je napustio sjednicu u 15,00 sati.

Nije više bilo učesnika u raspravi i predsjedavajuća OV je uz Zaključak Komisije za statutarna pitanja i propise stavila na izjašnjavanje Prijedlog Odluke o davanju saglasnosti za kupovinu građevinskog zemljišta(Kamenjaš Zijad-Sarajevo).

Nakon izjašnjavanja vijećnika predsjedavajuća OV konstatuje da **je jednoglasno (sa 12 glasova „ZA“) usvojena**

***Odluka o davanju saglasnosti za kupovinu  
građevinskog zemljišta (Kamenjaš Zijad-Sarajevo).***

**Ad.3.**

*(Prijedlog Odluke o prodaji nekretnine radi oblikovanja građevinske  
parcele Medžlisa Islamske zajednice Vareš (Kosići ZKU Ravne).*

Komisija za statutarna pitanja i propise na 4. sjednici održanoj 22.06.2021. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o prodaji nekretnine radi oblikovanja građevinske parcele Medžlisa Islamske zajednice Vareš (Kosići ZKU Ravne).  
Prijedlog Odluke upućuje se Vijeću na razmatranje.**

Predlagač nije imao dodatno pojašnjenje za ovu tačku dnevnog reda.

Nije bilo rasprave po ovoj tački dnevnog reda i predsjedavajuća OV stavila je na izjašnjavanje Prijedlog Odluke o prodaji nekretnine radi oblikovanja građevinske parcele Medžlisa Islamske zajednice Vareš (Kosići ZKU Ravne).

Nakon izjašnjavanja vijećnika predsjedavajuća OV konstatuje da **je jednoglasno (sa 12 glasova „ZA“) usvojena**

***Odluka o prodaji nekretnine radi oblikovanja građevinske parcele  
Medžlisa Islamske zajednice Vareš (Kosići ZKU Ravne).***

**Ad.4.**

*(Prijedlog Odluke o načinu i uslovima raspolaganja nekretninama  
u vlasništvu Općine Vareš (Upravna zgrada JKP Vareš).*

Komisija za statutarna pitanja i propise na 4. sjednici održanoj 22.06.2021. godine jednoglasno je donijela sljedeći Zaključak:

- **Komisija nema primjedbi na Prijedlog Odluke o načinu i uslovima raspolaganja nekretninama u vlasništvu Općine Vareš (Upravna zgrada JKP Vareš).  
Prijedlog Odluke upućuje se Vijeću na razmatranje.**

Pomoćnik načelnika Ermin Musa uz dato pojašnjenje predložio je dopunu u članu 1. da se na kraju člana dodaju riječi „*Predmet prodaje nije pokretni inventar koji se nalazi u ovom prostoru.*“

Nije bilo učesnika u raspravi i predsjedavajuća OV stavila je na izjašnjanje Prijedlog Odluke o načinu i uslovima raspolaganja nekretninama u vlasništvu Općine Vareš (Upravna zgrada JKP Vareš) sa predloženom dopunom.

Nakon izjašnjanja vijećnika predsjedavajuća OV konstatuje da **je jednoglasno (sa 12 glasova „ZA“) usvojena**

***Odluka o načinu i uslovima raspolaganja nekretninama  
u vlasništvu Općine Vareš (Upravna zgrada JKP Vareš).***

**Ad.5.**

*(Prijedlog Odluke o izmjenama Odluke o komunalnom redu.)*

Komisija za statutarna pitanja i propise na 4. sjednici održanoj 22.06.2021. godine jednoglasno je donijela sljedeći Zaključak:

**Komisija nema primjedbi na Prijedlog Odluke o izmjenama Odluke o komunalnom redu, s tim da se urade pravno tehničke ispravke i to::**

- član 1. stav 1. da glasi „U Odluci o komunalnom redu broj: 01-100/10 od 05.05.2010. godine i broj: 01-56/18 od 28.03.2018. godine, član 120. mijenja se i glasi:“ (ostali tekst u članu ostaje isti)
- član 2. da glasi: „ U članu 127. stav (1) riječi „300,00 KM“ zamjenjuju se riječima „100,00 KM“.
- član 3. da glasi: „U članu 128. stav (1) riječi „300,00 KM“ zamjenjuju se riječima „100,00 KM“.

**Prijedlog Odluke upućuje se Vijeću na razmatranje i usvajanje.**

Otvorena je rasprava u kojoj je učestvovao vijećnik Igor Hinger (*zadovoljan je izmjenama Odluke jer su stvoreni uslovi da eko policajac i komunalno-građevinski inspektor mogu izdati prekršajni nalog, smatra da građanstvo mora biti upoznato sa Odlukama o komunalnom redu (konkretno kad je u pitanju bacanje smeća) i izjavo je da će u formi zaključka tražiti da se provede kampanja, građani upoznaju sa odlukama i iznađe rješenje prijavljivanja osoba, od strane građana, koje učine bilo koji prekršaj narušavanja komunalnog reda).*

Predsjedavajuća OV upoznala je Vijeće sa Zaključkom Komisije za statutarna pitanja i propise za ovu tačku dnevnog reda.

Predsjedavajuća OV stavila je na izjašnjanje Prijedlog Odluke o izmjenama Odluke o komunalnom redu sa Zaključkom Komisije za statutarna pitanja i propise.

Nakon izjašnjanja vijećnika predsjedavajuća OV konstatuje da je uz Zaključak Komisije, **jednoglasno (sa 12 glasova „ZA“) usvojena**

***Odluka o izmjenama Odluke o komunalnom redu.***

Predsjedavajuća OV je na osnovu izlaganja vijećnika Igora Hinger stavila na izjašnjanje sljedeći



### **Zaključak:**

- **Da Stručna služba OV objavi, u usvojenom obliku, Odluku o izmjenama Odluke o komunalnom redu na web stranici Općine Vareš i na Radio Bobovcu Vareš.**

Nakon izjašnjavanja vijećnika predsjedavajuća OV konstatuje da je **jednoglasno (sa 12 glasova „ZA“)** usvojen predloženi Zaključak.

#### **Ad.6.**

*(Prijedlog Rješenja o imenovanju Komisije za popis stanova koji su u vlasništvu Općine Vareš.)*

Otvorena je rasprava u kojoj je vijećnik Nurdin Beganović, kao podnosilac Inicijative za imenovanje navedene Komisije, dao dodatno pojašnjenje za ovu tačku dnevnog reda i pozvao vijećnike da daju svoje prijedloge za eventualne dopune ili izmjene prijedloga Rješenja.

Nije više bilo učesnika u raspravi i predsjedavajuća OV stavila je na izjašnjavanje Prijedlog Rješenja o imenovanju Komisije za popis stanova koji su u vlasništvu Općine Vareš.

Nakon izjašnjavanja vijećnika predsjedavajuća OV konstatuje da je **jednoglasno (sa 12 glasova „ZA“)** usvojeno

***Rješenje o imenovanju Komisije za popis stanova koji su u vlasništvu Općine Vareš.***

#### **Ad.7.**

*(Izveštaj o radu JU „Dom zdravlja“ Vareš za 2020. godinu.)*

Otvorena je rasprava u kojoj su svoja mišljenja i pitanja iznijeli vijećnici: Nurdin Begović (*da li postoji mogućnost da specijalisti dolaze češće u Dom zdravlja i da Dom zdravlja vrši edukativne časove našim sugrađanima i učenicima u pružanju prve pomoći i, prevenciji od bolesti*), Maja Berberović (*skrenula pažnju na loše stanje pojedinih terenskih ambulanti i u vezi s tim zamolila direktora da Vijeću da eventualni prijedlog rješenja navedenog problema*) i Igor Hinger (*skrenuo pažnju na pacijente koji se javljaju u terenske ambulante za uzimanje terapije – da li postoji modus da im se terapija dostavi u ambulantu da ne dolaze u grad po istu*).

Direktor JU Dom zdravlja Vareš gosp. Fikret Operta u svom obraćanju dao je dodatna pojašnjenja za ovu tačku dnevnog reda i odgovorio na postavljena pitanja vijećnika u raspravi (saniranje terenskih ambulanti trebao bi finansirati Osnivač, češći dolazak specijalista iziskuje dodatna sredstva). Upoznao je prisutne i javnost sa podacima o vakcinisanju stanovništva protiv Covida i izjavio da je mali broj vakcinisanih zbog nedostatka vakcina koje Domu zdravlja dostavljaju nadležni iz Zenice.

Zaključena je rasprava i predsjedavajuća OV stavila je na izjašnjavanje Izveštaj o radu JU „Dom zdravlja“ Vareš za 2020. godinu.

Nakon izjašnjavanja vijećnika predsjedavajuća OV konstatuje da je **jednoglasno (sa 12 glasova „ZA“)** prihvaćen

***Izveštaj o radu  
JU „Dom zdravlja“ Vareš za 2020. godinu.***

#### **Ad.8.**

*(Izveštaj o radu JU Centar za socijalni rad Vareš za 2020. godinu.)*

Otvorena je rasprava u kojoj je učestvovao vijećnik Nurdin Begović (65.000 KM Centar je dobio manje sredstava od planiranog, koliko je to otežalo rad ustanove).

Direktorica JU Centar za socijalni rad Vareš gosp. Gondžo Nihada dala je dodatno pojašnjenje u vezi finansija, odnosno sredstava koja su namijenjena korisnicima usluga ustanove.

Nije više bilo učesnika u raspravi i predsjedavajuća OV stavila je na izjašnjanje Izveštaj o radu JU Centar za socijalni rad Vareš za 2020. godinu.

Nakon izjašnjanja vijećnika predsjedavajuća OV konstatuje da **je jednoglasno (sa 12 glasova „ZA“) prihvaćen**

***Izveštaj o radu  
JU Centar za socijalni rad Vareš za 2020. godinu.***

#### **Ad.9.**

*(Izveštaj o radu i poslovanju JPU „Dječije obdanište Vareš“ za 2020. godinu.)*

Otvorena je rasprava u kojoj su učestvovali vijećnici Nurdin Begović i Amela Brkić koja je uputila riječi zahvale uposlenicima ustanove.

Direktorica JPU „Dječije obdanište Vareš“ gosp. Vjerana Hinger u svom obraćanju dala je dodatno pojašnjenje i odgovorila na pitanje vijećnika Nurdina Begović o radu ustanove u vrijeme pandemije.

Nije više bilo rasprave po ovoj tački dnevnog reda i predsjedavajuća OV stavila je na izjašnjanje Izveštaj o radu i poslovanju JPU „Dječije obdanište Vareš“.

Nakon izjašnjanja vijećnika predsjedavajuća OV konstatuje **je jednoglasno (sa 12 glasova „ZA“) prihvaćen**

***Izveštaj o radu i poslovanju  
JPU „Dječije obdanište Vareš“ za 2020. godinu.***

#### **Ad.10.**

*(Izveštaj o radu JU Centar za kulturu i edukaciju Vareš za 2020. godinu.)*

Otvorena je rasprava u kojoj je učestvovao vijećnik Nurdin Begović koji je postavio pitanje koje su to potrebe kako bi ustanova poboljšala svoj rad. O istom je dao pojašnjenje.

Zamjenik direktorice JU Centar za kulturu i edukaciju Vareš gosp. Stjepan Šimić dao je odgovor da bi ustanova bolje i uspješnije radila i poslovala, potrebno je u budžetu Općine planirati sredstva namijenjena za održavanje kulturnih manifestacija.

Nije bilo više učesnika u raspravi i predsjedavajuća OV stavila je na izjašnjanje Izvještaj o radu JU Centar za kulturu i edukaciju Vareš.

Nakon izjašnjanja vijećnika predsjedavajuća OV konstatuje da je **jednoglasno (sa 12 glasova „ZA“) prihvaćen**

***Izvještaj o radu  
JU Centar za kulturu i edukaciju Vareš za 2020. godinu.***

**Ad.11.**

*(Izvještaj o radu JU Opća biblioteka Vareš za 2020. godinu.)*

Otvorena je rasprava u kojoj je učestvovao vijećnik Dario Dodik koji je postavio pitanje u vezi eventualnog pronalaska drugog prostora za smještaj ustanove koji je u vlasništvu Općine Vareš, jer za sadašnji prostor ustanova plaća zakupninu.

Direktorica JU Opća biblioteka Vareš gosp. Ilijana Gavran Radojević u svom obraćanju upoznala je prisutne sa određenim sprovedenim aktivnostima u vezi trajnog rješenja prostora. Nada se da će u nekom narednom periodu iznaći način ili eventualna sredstva za trajno rješavanje prostora za smještaj ustanove.

Nije više bilo učesnika u raspravi i predsjedavajuća OV stavila je na izjašnjanje Izvještaj o radu JU Opća biblioteka Vareš za 2020. godinu.

Nakon izjašnjanja vijećnika predsjedavajuća OV konstatuje da je **jednoglasno (sa 12 glasova „ZA“) prihvaćen**

***Izvještaj o radu  
JU Opća biblioteka Vareš za 2020. godinu.***

**Ad.12.**

*(Informacija o realizaciji Ugovora o koncesijama za 2020. godinu.)*

Predlagač nije imao dodatno pojašnjenje za ovu tačku dnevnog reda.

Otvorena je rasprava u kojoj je vijećnik Dario Dodik postavio pitanja u vezi koncesionog ugovora sa BBM i eksploatacije krečnjaka.

Pomoćnik načelnika Ermin Musa dao je odgovor i pojašnjenje u vezi koncesionog ugovora, odnosno količina na koje se plaća koncesija.

Nije više bilo učesnika u raspravi i predsjedavajuća OV konstatuje **uz Zaključak da je Vijeće primilo k znanju**

***Informaciju o realizaciji Ugovora o koncesijama za 2020. godinu.***

### Ad.13.

*(Informacija o provođenju Strategije razvoja i unapređenja socijalne zaštite na području općine Vareš za period 2019-2024. godina, za 2020. godinu.)*

Predlagač nije imao dodatno pojašnjenje za ovu tačku dnevnog reda.

Nije bilo rasprave po ovoj tački i predsjedavajuća OV konstatuje **uz Zaključak da je Vijeće primilo k znanju**

*Informaciju o provođenju Strategije razvoja i unapređenja socijalne zaštite na području općine Vareš za period 2019-2024. godina, za 2020. godinu.*

### Ad.14.

*(Tekuća pitanja.)*

Predsjedavajuća OV upoznala je prisutne sa pristiglom poštom:

1. Zahtjev za realizaciju projekta izgradnje višenamjenskog sportskog igrališta u MZ Budoželje, broj:9505/21 od 26.05.2021. godine dostavljen od predsjednika MZ Budoželje i Obavještenjem Općinskog načelnika broj: 02-1224/21 od 29.06.2021. godine koje je dostavljeno predsjedniku mjesne zajednice. **(Vijeće primilo na znanje)**
2. Inicijativa za uređenje gradske jezgre i formiranje posebnog fonda za finansiranje uređenja gradskog jezgra od 31.05.2021. godine dostavljena od vijećnice SDA gosp. Sahudine Beganović. **(Kolegij je dostavio Inicijativu Općinskom načelniku i Službi za prostorno uređenje. Predsjedavajuća OV uputila je urgenciju za što hitnije očitovanje po ovoj Inicijativi)**
3. Obavijest o provedenim aktivnostima u predmetu kontrole zbrinjavanja klaoničkog otpada broj:02/3-1627/21 od 14.06.2021. godine sa priložima kantonalnog veterinarskog inspektora broj:18-20-04878/21-15-11-003-P i kantonalnog inspektora zaštite okoliša broj:18-19-06785/21-13-002-P. **(informativno).**
4. Informacija Općinskog načelnika u vezi Zaključka Komisije za privredu, finansije i budžet, broj: 02-1185/21 od 15.06.2021. godine. **(Kolegij razmatrao i donio zaključak da se pristupi realizaciji Zaključka Komisije za privredu, finansije i budžet sa 2. sjednice održane 26.05.2021. godine.)**
5. Očitovanje Stručne službe OV broj: 01/01-114/21 od 16.06.2021. godine po Inicijativi vijećnika Asmira Čizme o racionalnom korištenju vremenskog trajanja sjednice Općinskog vijeća. **(informativno, nije bilo rasprave po očitovanju).**
6. Očitovanje Općinskog načelnika broj. 02-1194/21 od 17.06.2021. godine po Inicijativi Kluba SDP u vezi stavljanja van snage Odluke Općinskog vijeća, donesenoj u prethodnom sazivu kojem je povećan vijećnički paušal sa 200,00 na 240,00 KM od 16.02.2021. godine.

Zamjenik predsjedavajuće OV Mirnes Ajanović uz dato pojašnjenje izjavio je da Klub SDP nije zadovoljan Očitovanjem po Inicijativi i da ne odustaje od Inicijative.

Predsjedavajuća OV je na osnovu izjave zamjenika predsjedavajućeg OV da Klub SDP ne odustaje od Inicijative, upoznala OV da se Vijeće treba o istoj izjasniti.

Vijećnik Dario Dodik uz dato obrazloženje izjavio je da podržava Inicijativu.

Vijećnik Šaban Ibrišimović izjavio je da podržava Inicijativu i predložio da se izjašnjava po istoj odgodi za narednu sjednicu OV, jer na današnjoj sjednici nisu prisutni vijećnici iz stranke SDA.

Zamjenik predsjedavajuće OV izjavio je da želi da se Vijeće po Inicijativi izjasni na današnjoj sjednici.

Na osnovu traženja zamjenika predsjedavajuće OV, predsjedavajuća OV stavila je na izjašnjavaње **Inicijativu Kluba SDP da se Odluka o naknadama vijećnika i članova radnih tijela Općinskog vijeća Vareš, broj: 01-18/18 od 31.01.2018. godine izmijeni na način da se vijećnički paušal sa 240,00 KM ponovo vrati na 200,00 KM.**

Nakon izjašnjavaње vijećnika predsjedavajuća OV konstatuje da **sa 9 glasova „ZA“ i 3 „SUZDRŽANA“ glasa Inicijativa nije usvojena.**

7. Zastupnička pitanja zastupnika gosp. Damira Arnauta, broj: 01-50-1-15-21/21 od 14.06.2021. godine dostavljena od Predstavničkog doma BiH u vezi Inicijative kojoj predlaže da nadležne institucije entiteta, kantona i općina u svim dijelovima BiH da ulice, trgove, parkove, škole i druge javne površine i ustanove koje trenutno nose nazive po osobama ili organizacijama koje su u bilo kom trenutku, surađivale, pripadale ili na drugi način djelovale na strani ili u koordinaciji sa okupacijskim, nacističkim ili fašističkim snagama u Drugom svjetskom ratu, odnosno javno ih podržavale ili opravdavale, zamijene osobama iz BiH koje su priznate kao Pravednici među narodima od strane Yad Vashem centra.

Predsjedavajuća OV upoznala je sa odgovorom po istom koji se treba dostaviti u kome je navedeno da na području općine Vareš ne postoje ulice, trgovi, parkovi, škole ili druge javne površine i ustanove koje su nazvane po osobama ili organizacijama navedenih u poslaničkom pitanju i Inicijativi poslanika gosp. Damira Arnauta.

Isti je stavila na izjašnjavaње i nakon izjašnjavaња konstatuje da je Vijeće **jednoglasno (sa 12 glasova „ZA“) u ponuđenoj formi usvojilo odgovor.**

8. Predsjedavajuća OV iznijela je svoje mišljenje o stanju i problematici u vezi nedovoljnog parking prostora u gradu. U vezi s tim izjavila je da bi bilo potrebno donijeti zaključak za izmjenu Odluke o bezbjednosti saobraćaja na cestama (član 8. točka d- u kome je navedeno da je zabranjeno zaustavljanje i parkiranje vozila osim subote u vrijeme pijace), Napomenula je da u istoj u članu 12. stoji da „prostor za parkiranje motornih vozila određuje OV uz prethodno pribavljeno mišljenje PS Vareš“, mišljenje možemo tražiti ali nije obavezujuće. Podsjetila je na situaciju tzv. dječijeg igrališta i prema informacijama ni košarkaško igralište a ni dječije igralište nemaju odgovarajuće dozvole (urbanistička, građevinska i upotrebna). U vezi svega navedenog pozvala je pomoćnika načelnika Ermina Musa da Vijeću da pojašnjenje.

Pomoćnik načelnika Ermin Musa u svom obraćanju upoznao je Vijeće da je u prošlom mandatu bilo rasprave o načinu korištenja dječijeg igrališta i da je određen drugi termin za parkiranje, ali na inicijativu Vijeća roditelja OŠ Vareš urađene je izmjena i donesena druga odluka koja se sada primjenjuje. Igralište je napravljeno od donatorskih sredstava. Na pitanje predsjedavajuće OV da li igralište ima

potrebne dozvole, upotrebnu dozvolu odgovorio je da ne može trenutno odgovoriti na pitanje.

Predsjedavajuća OV izjavila je da bi bilo potrebno izmijeniti termin dozvole za parkiranje vozila na dječijem igralištu.

U raspravi su iznijeli svoje mišljenje u vezi rješavanja problematike parking prostora vijećnici: Igor Hinger, Dario Dodik, Maja Berberović, Mario Mirčić i pomoćnik načelnika Ermin Musa koji je upoznao Vijeće da je formirana komisija od strane Općinskog načelnika za pripremu Nacrta i prijedloga Odluke za parkiranje motornih vozila (5 članova -1 član ispred PS Vareš). Ne zna da li će za iduću sjednicu biti pripremljen Nacrt jer je vrijeme godišnjih odmora.

Predsjedavajuća OV je uz dato pojašnjenje zaključila da na osnovu rasprave nema dovoljno podrške za inicijativu da nekako ugradimo i djecu i ostale građane i nema potrebe ni da je predlaže. Traži da se u Zapisnik unese da su nadležne općinske službe isključivo odgovorne, jer prije svega nisu ovom OV mogle da daju čak ni informaciju da li postoji sva potrebna dokumentacija, odnosno upotrebna dozvola za nešto što se zove „dječije igralište“ i da li ustvari ima uopće formalno-pravni osnov da ga nazivamo dječijim igralištem.

9. Vijećnik Dario Dodik u svom izlaganju o problematici parking mjesta podsjetio je na svoju inicijativu za manji parking u malom dječijem parku koji se služi svrsi na koju još nije dobio očitovanje. Predložio je i predao Službi OV novu Inicijativu da se pokrene procedura za izmjene i dopune Poslovnika o radu Općinsko vijeća Vareš – u članu 105. stav 2. iza riječi „...u roku od 15 dana razmotriti inicijativu i o svom stavu obavijestiti OV“ dodaju riječi: „Ukoliko općinski načelnik u navedenom roku ne obavijesti OV o svom stavu, smatrat će se da nema primjedbi na inicijativu.“

10. Vijećnik Asmir Čizmo uz dato pojašnjenje predložio je

#### **Zaključak:**

**Zadužuje se Načelnik općine Vareš da izvrši prijavu postojanja nelegalne divlje deponije na teritoriji Općine Breza ili kako je nazivaju „pretovarne stanice“ i to nadležnoj FEDERALNOJ UPRAVI ZA INSPEKCIJSKE POSLOVE na dalje postupanje, da kontinuirano uz pomoć nadležnih općinskih službi prati realizaciju od strane FUZIP-a te da obavijestava Općinsko vijeće Vareš o poduzetim i realizovanim aktivnostima od strane FUZIP-a.**

Predsjedavajuća OV stavila je na izjašnjavanje predloženi Zaključak i nakon izjašnjavanja vijećnika konstatuje da je **jednoglasno (sa 12 glasova „ZA“) usvojen predloženi Zaključak.**

11. Predsjedavajuća OV u svom obraćanju skrenula pažnju na nedostatak neophodnih „ležećih policajaca“ na reg. putu i nedozvoljene brzine pojedinih vozača.

U raspravi su iznijeli svoje stavove i mišljenje po istoj tematici vijećnici: Maja Berberović i Asmir Čizmo. Nakon rasprave i iznesenih prijedloga predsjedavajuća OV predložila je i stavila na izjašnjavanje sljedeći

### **Zaključak:**

Upućuje se Zahtjev Općinskog vijeća Vareš prema Ministarstvu prostornog uređenja, prometa i komunikacije i zaštitu okoline i Kantonalnoj direkciji za ceste Ze-do kantona nadležnim za regionalni put R-444 da se hitno postave ležeći policajci, a u neko dogledno vrijeme i nadzorne kamere ili radari u naseljenim mjestima općine Vareš (naseljeno mjesto Dabravine kod škole – isti bili postavljeni i uklonjeni prilikom rekonstrukcije), u gradskom području Vareša (Vareš Majdan - kod robne kuće, ispred zgrade Parlament-skretanje prema Mjesnoj zajednici Stupni Do).

Isto tako zahtijevamo da se na regionalnom putu kroz samo gradsko područje u Varešu kod PS Vareš i u ul. Zvijezda kod pijace postave ležeći policajci, i također razmotri mogućnost postavljenja nadzornih kamera ili radara.

U svrhu svega naprijed navedenog napominjemo da se u proteklih mjesec dana desio nemio događaj saobraćajne nesreće sa smrtnim ishodom i to baš na mjestu gdje sada zahtijevamo postavljenje ležećeg policajca (u blizini zgrade „Parlament“).

Ovaj Zahtjev upućujemo radi sprečavanja brze vožnje vozača kroz gore navedena mjesta, povremenih saobraćajnih nezgoda i radi podizanja bezbjednosti za građane, a posebno za učenike.

Ukoliko ne bude ispoštovan predmetni Zahtjev budite spremni da snosite i odgovornost za prethodno opisane slučajeve ili slične.

Nakon izjašnjavanja vijećnika predsjedavajuća konstatuje da **je jednoglasno (sa 12 glasova „ZA“)** usvojen predloženi Zaključak.

12. Vijećnik Šaban Ibrišimović uz dato pojašnjenje predložio je sljedeći

### **Zaključak:**

Da se uputi dopis eko policajcu Općine Vareš da u narednih 60 dana vrši izlazak na teren (Mijakovsko poljice, Goruško poljice, Slavinsko brdo i selo Mijakovići), a sve u smislu utvrđivanja činjeničnog stanja, odnosno da li se narušava komunalni red od strane osoba koje sa drugih općina dolaze na navedeni lokalitet radi ubiranja šumskih plodova.

Sa istim upoznati i PS Vareš, da ovlaštene službenici PS Vareš vrše obilazak navedenih lokaliteta.

Predsjedavajuća OV stavila je na izjašnjavanje predloženi Zaključak i nakon izjašnjavanja vijećnika konstatuje da je **jednoglasno (sa 12 glasova „ZA“)** usvojen predloženi Zaključak.

13. Vijećnica Maja Berberović podsjetila je Vijeće na Inicijativu, koju je podnijela prije dvije sjednice, za sanaciju regionalne ceste R 444 na potezu od Breze do Vareša i izradi plana sanacije iste u naredne četiri godine. Tražila je da se Inicijativa uputi prema Kantonalnoj direkciji za ceste i nadležnom ministarstvu. Dogovor je bio da će Općinski načelnik i vijećnik Šaban Ibrišimović obaviti razgovor sa nadležnim ministrom. Još uvijek nemam povratnu informaciju šta se desilo na tom sastanku.

Vijećnik Šaban Ibrišimović odgovorio je vijećnici da je dogovoreno i odobreno 200.000 KM u ovoj godini za rekonstrukciju asfaltiranih regionalnih cesta na području općine Vareš i 300.000 KM za 2021. i 2022. godinu za regionalnu cestu R 444a.

14. Zamjenik predsjedavajuće OV Mirnes Ajanović zahvalio se vijećnicima koji su podržali njegovu Inicijativu i izjavio da podnosi ostavku na mjesto zamjenika predsjedavajuće OV. Ostavku će i u pisanom formi podnijeti nadležnoj službi.

Sastavni dio ovog Zapisnika je audio zapis sjednice.

Sjednica je završena u 17,02 sati.

***SEKRETAR***

**Leon Pavlović**

***ZAPISNIČAR***

**Azra Pijadžer**

***PREDSJEDAVAJUĆA  
OPĆINSKOG VIJEĆA***

**Mahira Brkić**